



JUDICIAL SYSTEM MONITORING PROGRAMME

PROGRAMA MONITORIZASAUN SISTEMA JUDICIAL

Komunikadu Imprensa

Periodu: Outubru, 2010

Edisaun: 14 Outubru 2010

Tribunál Distritál Dili hala'o julgamentu ba kazu abandona obrigasaun alimentar ba oan

Iha loron 11 Fulan Outubru 2010, Tribunál Distritál Dili hala'o audensia julgamentu ba kazu abandona ka la halo tuir obrigasaun alimentar ne'ebé mak komete husi arguidu NAP hasoru nia oan FP nu'udar rezultadu husi relasaun *uniaun de faktu* ka "*kompul kebo*" ho MGPCP iha tinan 2003. Arguidu la hala'o nia obrigasaun atu fo alimentu ba nia oan FP durante tinan 5 nia laran.

Kazu ho numeru prosesu 689/C.ord/TDD/2009, ne'e deriji husi juiz Alvaro Maria Freitas. Husi Ministériu Públiku, representa husi Dr. Felismino Cardoso no husi parte Defeza representa husi Dra. Marcia Sarmento husi Defensoria Públika.

Diretor ezekutivu JSMP Luis de Oliveira Sampaio haktuir katak "*kazu abandona familia iha realidade Timor Leste nian ohin loron buras teb-tebes tambá ema barak intende katak la iha lei konabá realidade ida ne'e. Maibe ho prosesu ne'ebé Tribunal Distrital Dili inisia hatudu katak aktu abandona, nu'udar aktu kriminal ne'ebé tenke prosesa tuir lei ne'ebé vigor. Ho meus hanesan ne'e deit mak obriga sira ne'ebé la kumpri sira nia obrigasaun atu fo alimentasaun ba alimentadu sira tuir lei haruka.*

Bazea ba kronolojia kazu ne'ebé mak haktuir husi juiz iha audensia julgamentu nia laran, katak kazu ne'e akontese iha aldeia Taibesi, Suku Lahane, Distritu Dili iha fulan Agostu tinan 2004. Wainhira arguidu ne'ebé mak lolos iha obrigasaun atu fo alimentasaun ba nia oan, la kumpri nia obrigasaun atu fo alimentu ba nia oan. Alende ne'e Juiz mos haktuir tan katak, maske iha fulan balun (maiz ou menus fulan lima) depois labarik moris, arguidu fo alimentasaun bazea ba akordu ne'ebé mak halo entre arguidu ho MGPCP, maibe depois fulan sira tuir mai to'o agora, arguidu la kumpri nia obrigasaun atu fornese alimentu ba nia oan.

Bazea ba observasaun JSMP nian katak iha alegasaun final Ministériu Públiku nian, Ministériu Públiku bazea ba artigu 225 Kódigu Penál Timor Leste. Iha prosesu refere, Ministériu Públiku husu ba Meritisimu Juiz ne'ebé lidera prosesu ne'e, hodi hamonu pena suspensaun deit. Razaun hodi husu suspensaun ba pena tambá, kuandu arguidu ba kumpri nia pena iha prizaun, mak arguidu sei la bele halo serbisu hodi bele fo alimentasaun ba nia oan nu'udar obrigasaun ne'ebé

arguidu tenke kumpri. Aleinde ne'e Ministériu Públiku husu mos atu arguidu tenke fo hotu obrigasaun alimentasaun ne'ebé mak nia la kumpri durante tinan 5 nia laran ba nia oan.

Husi parte defeza konkorda ho argumentu husi Ministériu Públiku, exeptu ba obrigasaun alimentu ne'ebé mak arguidu la kumpri durante tinan 5, tambá arguidu ne'ebé hala'o ninia knar nu'udar taxista, iha rendementu ne'ebé minimu.

JSMP mos observa katak antes julgamentu hahu, bazeia ba artigu 262 Kódigu Prosesu Penál juiz tenta atu halo medida konsiliaun tambá kazu ne'e ho natureza semi públiku, maibe la consege tambá MGPCP ne'ebé mak nu'udar lezada FP nia inan lakohi atu halo konsiliaun.

Audensia julgamentu hodi le'e leitura sentensa, sei hala'o iha loron 26 Outubru 2010, Oras 14.00 loro-kraik Oras Timor Leste.

Atu hetan informasaun kle'an, favor kontaktu:

Luis de Oliveira Sampaio

Directór Ezekutivu JSMP

Email: luis@jsmp.minihub.org

Landline: 3323883